



Филимонгъа язылгъан кагъыз

Павелни бу кагъызы Румда язылгъан. Филимон Исагъа иман салгъанланы Колосдагъы жыйыныны ортакъчысы болгъан. Филимонну Онесим деген бир къулу, есин де ташлап, Румгъа къачгъан болгъан. Шо шагъарда болгъан бир агъвалат ону яшавун бюс-бю-тунлей алышдырып къоя: о элчи Павел булан ёлугъа. Павелден Онесим оъзюню Къутгъарывчусу болгъан Исаны гъакъында эшите ва Огъар иман сала. Къачгъаны саялы оъзюн къатты койде такъ-сырламагъа болажагъына да къарамайлы, шо агъвалат Онесимни есине къайтмаса ярамай деген гъасилге гелтире. Павел оъзюню кагъызын Филимонгъа къулуна бакъгъан якъда рагъмулу болсун ва языкъсынсын деп яза, неге тюгюл де Филимон йимик о да Исагъа иман салгъан. Павел къулчулукъгъа туврадан къаршы чыкъмаса да, о Онесимни де, Филимонну да арасында энни янгы аралыкълар бегигенни ачыкъ койде айтып бере: «Сонг сени булан даимге къалмакъ учун, балики, о сенден заманлыкъгъа айрылгъан болгъандыр. Гъали буса о сени янгыз къулунг болуп къалмай, сююмлю къардашынг да дюр. О мени учун да бек аявлу. Къул гъисапда ва Раббизге иман салгъан къардаш гъисапда о сени учун да дагъы да аявлу болажагъына мен инанаман» (1:15-16).

1 ¹Иса Месигъе къуллукъ этегеним саялы туснакъдагъы мен Павелден ва иман къардашыбыз Тимофейден иман ёлундагъы сююмлю иш ёлдашыбыз Филимонгъа, ²Исагъа иман салгъанланы сени уюнгде жыйылагъанларына, иман къызардашыбыз Афиягъа ва иман ёлундагъы иш ёлдашыбыз Архипге салам!

³Атабыз Аллагъдан ва Раббиз Иса Месигъден сизге рагъму ва пархатлыкъ болсун.

⁴Сююмлю Филимон, мен дуа этегенде, сени учун даим Аллагъа шокор этемен. ⁵Сени Раббиз Исагъа ва Аллагъны бары да халкъына бакъгъан якъдагъы сюювюнгню ва олай да иманынгны гъакъында эшитемен. ⁶Месигъ булан бирлигизни себебинден бизде де яхшылыкъ бар.

Барыбызгъа да ортакъ болгъан сени иманынг шо яхшылыкъгъа тюшюнювге гелтирсин деп, мен дуа этемен. ⁷Сен Аллагъны халкъын рагъатландырып турдунг. Шо саялы, къардашым, сени олагъа бакъгъан якъдагъы сюювюнг мени къувандырып ва ругъландырып тура.

⁸Месигъни аты булан мен сагъа гъеч тартынмайлы борчунгню эсинге салып болур эдим. ⁹Тек биз бирев-биревню сюегенибиз саялы, мен, Павел, бир къарт чагъымдагъы ва гъали Иса Месигъе къуллукъ этегеним себепли болуп туснакъдагъы адам, сагъа тилемекни къолай гёремен. ¹⁰Мен туснакъдагъы заманда оъзюмню авлетимдей гёрген уланым Онесимге бир рагъму этмекни сагъа тилеймен. ¹¹Алда ону сагъа гъеч пайдасы болмагъандыр, амма гъали о сени ва мени учун пайдалы.

¹²Оъзюмню бир янымны айырып тайдыргъандай болса да, мен къайтарып ону сени янынга йиберемен. ¹³Сююнч Хабарны билдирегенимни себебинден туснакъгъа тюшгеним саялы, сени орнунга о магъа кёмек этип турсун деп, мен ону мунда къоймагъа сюер эдим. ¹⁴Амма сени разилигинг болмай туруп, мен шолай этмеге скоймеймен. Сен шо яхшы ишни борчлу болуп тюгюл, оъзюнг сююп этгенингни сюер эдим.

¹⁵Сонг сени булан даимге къалмакъ учун, балики, о сенден заманлыкъгъа айрылгъан болгъандыр. ¹⁶Гъали буса о сени янгыз къулунг болуп къалмай, сююмлю къардашынг да дюр. О мени учун да бек аявлу. Къул гъисапда ва Раббизге иман салгъан къардаш гъисапда о сени учун да дагъы да аявлу болажагъына мен инанаман.

¹⁷Шолай болгъанда, эгер сен мени оъзюнгню ёлдашынг деп гъисап эте бусанг, мени нечик къабул этежек эдинг бусанг, ону да шолай къабул эт. ¹⁸Эгер гъеч бир затда о сени хатирингни къалдыргъан буса яда сагъа борчлу буса, шо борч сагъа мени борчум деп гъисап этип къой. ¹⁹Мен, Павел, муну оъзюмню къолум булан язаман: мен тёлежекмен! Сен де магъа борчлу экенингни мен айтмай да къояман. Оъз-оъзюнгню борчлусан! ²⁰Шогъар гёре, къардашым, Раббизни хатиринден бу яхшы ишни мени учун эт. Месигъе иман салгъан къардаш йимик, мени юрегимни рагъатландыр.

²¹Сагъа язагъаным – мен тилеген затны сен этежекге инанаман. Мен тилегенден де артыкъны этежегингни билемен. ²²Бирдагъы бир зат: мени учун бир уй гъазир эт. Неге тюгюл де, дуаларыгъыз къабул болуп, мен сизин яныгъызгъа къайтарман деп умут этемен.

²³Мени йимик, Иса Месигъе къуллукъ этегени саялы туснакъ этилген Эпафрас ²⁴ва шолай да иман ёлундагъы мени иш ёлдашларым Марк, Аристарх, Демас ва Лукъа да сагъа саламлар йиберелер.

²⁵Раббиз Иса Месигъни рагъмусу сизин ругъугъуз булан болсун.